

DIDZA' GUSÓL-LĒ'Ē PABLO QUEĒBI' BI'I TITO

Pablo rugapë' Dios bi'i Tito

1 ¹ Neda', Pablo, naca' huen dxin queë' Dios, en gubáz nasól-lē'ē Jesucristo. Gusól-lē'ē neda' para guna' ga ila'yéajlë' bönachi chiguró cazë' Dios, para ulu'únbë' le naca idútë li ca ral-la' gun nu nunbë' Dios. ² Caní naca' tu' runa' löza uzi'a xibé yöl-la' na'bán idú le guzxi' lu në'ē Dios gunnë' queëru' dza ni'te, cate' si' gusí lo rata' yúgu'të le dë, ate' run cazë' Lë' le nazí' lu në'ē gunë'. ³ Cate' bidxín dza que, Dios bulu'e lahui xtídzë'ē, le gulu'ē lu na'a guna' libán que. Caní gunná bé'enë' Dios, Nu busölá rë'u, neda'. ⁴ Rugapa' Dios li', böcha'ado' Tito. Nacu' idú zxi'ini caza' tu' naca lébisö ca réajlë'ëru' Cristo. Rinábida'-në' Dios Xuz, en Xanru' Jesucristo Nu busölá rë'u, uzá' ládxë'ē quiu', en huéchi' ládxë'ē li', en gunë' ga soa dxi icja ládxi'do'o.

Dxin queë' Cristo runbi' bi'i Tito luyú Creta

⁵ Que lë ni na' bucá'ana' li' luyú Creta, para usó'o le riyadzaj quégaca bönachi queë' Cristo nacuá' ni', para ilácagaca idú bönachi queë' Cristo, en para ucú'u bönni' gula yúgu'të yödzö para ilún chilë bönachi queë' Cristo nacuá' tu tu yödzö ni', ca na' chigunná bé'eda' li' gunu'. ⁶ Nu bönni' gula rapa chilë bönachi queë' Cristo ral-la' gáquië':

Bönni' cuntu nu bi gaca inné queë'.

Zoa túzinu nigula queë'.

Yugu' zxi'inë' ral-la' ila'yéajlë'ëbi' Cristo.

Biti' soa nu gaca inné quégacabi' ta'dá dzágasibi' ca',

o ta'dá'bagab'bi' xuz xiná'agacabi'.

⁷ Nu bönni' rapa chilë bönachi queë' Cristo run bayudxi:

Biti' runë' le güí'i lataj nu bi inné queë' ca runë' xichinë' Dios.

Biti' gáquië' bönni' zidi o bönni' icja dza'a,

o bönni' re'jë', o bönni' ribíxjanë',

o bönni' rizé ládxi'së' dumí.

⁸ Ral-la' gu'ë ga ila'cu'ë böchi'ru' ta'dxinë' lidxë'.

Ral-la' së ládxë'ē gunë' le naca dxi'a.

Ral-la' gáquië' bönni' réajni'i, en bönni' tsahui'.

Ral-la' gádxinë' Dios, en inná be'e cuinë'.

⁹ Ral-la' gun chilë didza' idútë li ca chinazëdë',

para gaca ichízië' icja náagaca bönachi ca sa'yéaj xibá dxi'a,

en para gaca usayjë' rú'agaca bönachi ta'nné que.

¹⁰ Caní ral-la' gáquië' tu' ta'dá'baguë'ē zían bönni', en tu'ë didza' biti' nazaca', en ta'zí' yé'enë' bönachi. Zían bönni' tunë' caní nácagaquië' judío. ¹¹ Yugu' bönni' ni, run bayudxi gunu' ga tsayaj ruá'agaquië', tu'

tunë' ga ta'chixi ta'nigui yúgu'të bönachi nacuá' yu'u gapa ta'yázië', en tu'sédinë' le cabí ral-la' ulu'sédinë'. Caní tunë' para ila'zísë' dumí.

¹² Tuë' bönni' gubábë' bönachi Creta ga na' zu', bönni' na' bē'ë didza' uláz que yudo' quégaquië', gunné': "Ta'zís' yé'tica'së' bönni' Creta, en nácagaquië' ca böa' guí'a sínia'. Nácagaquië' bönni' huágulë'ë xöhuëdi."

¹³ Didza' ni benë' ba nalí quégaquië' naca idútë li. Que lë ni na' gudil-la légaquië' para gaca idú ca ta'yéajlë'ë Cristo, ¹⁴ en para cabí ulu'zé nágagaquië' yugu' didza' ridasö quégaquië' bönni' judío, en bití' ilunë' ca ta'nná bē' bönachi nucá'anagaca le naca idútë li.

¹⁵ Yúgu'të naca dxi'a quégaca nupa nácagaca dxi'a, pero quégaca nupa nácagaca xihui', en bití' ta'yéajlë', bití' bi naca dxi'a, pero nácagaca xihui' ga ridxintë le ta'bequi ícjaguequi, en le ta'zá' ládxi'gaca.

¹⁶ Ta'nné' núnbë'gaquië' Dios, pero le túngaquië' bití' röjlóz le ta'nné' tu' nácagaquië' bönni' tu'dí'inë' Dios. Ta'dá'baguë'ë xtídzë'ë, en bití' ca' gaca ilunë' le naca dxi'a.

Xibá dxi'a le ral-la' usédiru'

2 ¹ Na'a, ral-la' gu'u didza' le röjlóz xibá dxi'a.

² Busedi yugu' bönni' gula:

Bití' ral-la' ilé'ajë'.

Ral-la' iláquië' ba'a ladxi', en bönni' ta'yéajni'inë'.

Ral-la' gaca idú ca ta'yéajlë'ë Cristo.

Ral-la' ila'dxí'inë' luzá'agaquië', en ila'bözë' zxön ladxi'.

³ Busedi yugu' nigula gula:

Ilunnu le raza ládxië'ë Dios.

Cabí ila'nnënu que luzá'agacanu, en cabí ilé'ajnu.

Ral-la' ulu'sédinu le naca dxi'a.

⁴ Ral-la' ulu'sédinu' nigula ni' yú'ugacanu iz cuidi' para ila'dxí'inu bönni' que queégacanu, enca' zxí'inigacanu.

⁵ Ral-la' ilácanu nigula ta'yéajni'inu, en nigula dxi'a ladxi'.

Ral-la' ilún chí'inu le dë lídxi'gacanu, en ilácanu dxi'a.

Ral-la' ilunnu bal bönni' que queégacanu.

Ral-la' cabí bi ilunnu le güí'i lataj nu inné' zi' que xtídzë'ë Dios.

⁶ Busedi yugu' bönni' ni' nacu'ë iz cuidi':

Ral-la' ilácagaquië' bönni' ta'yéajni'inë'.

⁷ Ral-la' gúntica'su' le naca dxi'a,

uluí'inu' bönachi caní ca ral-la' ilúngaca.

Ca rusédinu' ral-la' uluí'i nacu' idú ladxi', en ba'a ladxi'.

⁸ Ral-la' usédinu' didza' dxi'a le cabí gaca nu bi inné' que.

Caní gunu' ga utuí'inë' bönni' ridá'baguë'ë,
en bití' gaca bi inné' queéli' runli' le ruá' dö'.

⁹ Busedi bóchi'ru' ni' ta'yéajlë'ë Cristo, en nadó'ogaquië':

Ral-la' ila'cu'ë nöxaj lógaquië' xángaqüë'.

Ral-la' ilunë' yúgu'të le ila'yaza ládxi'gaquië' xángaquië'.

Biti' ral-la' tá'baga'gaquië' le ta'nná bē'ē.

¹⁰ Biti' bi ulu'cáchi'lanë'.

Ral-la' ulu'luí'i cuíngaquië' tsahui' ca naca yúgu'të le tunë'.

Caní uluí'i lo naca dxi'a xibá queë' Dios, Nu busölá rē'u.

¹¹ Cristo, bönni' na' buzá' ládxē'ē Dios queéru' chibuluí'i lahuë' lógaca yúgu'të bönachi para ulu'lágaca. ¹² Lē' rusédinē' rē'u ucá'anaru' le cabí raza ládxē'ē Dios, en cabí sē ládxi'ru' le naca que yödzölió ni, pero cózaru' zxön ladxí', en gácaru' tsahui' dza ni zóaru' na'a, en gunru' ca ré'ēni quézínē' Dios. ¹³ Ral-la' cózaru' le runru' löza le gun ga gácaru' bica' ba, lē na' gaca dza ni' cate' uluí'i lahuë' Jesucristo lu bení' idú queë'. Náquië' Dios zxön, Nu rusölá rē'u. ¹⁴ Lē cazē' budödi cuinë' uláz queéru', para böá'uē' rē'u lu yúgu'të le naca xihui', ate' ruúnē' rē'u tsahui' para gácaru' bönachi queë', en güí'i ládxi'ru' gunru' le naca dxi'a.

¹⁵ Yugu' lē ni bē' didza', en guchiza icja náagagaca bönachi ni', ate' len yöl-la' unná bē' gudil-la léguequi. Béntica'sö caní, para cabí si' lataj nu ucá'ana cá'asö xtídz'u.

Le ral-la' ilún bönachi ta'yéajlë' Cristo

3 ¹ Busá' ládxi'gaquië' bóchi'ru' ni' ilunë' ca ta'nnē' bönni' dē lu ná'agaquië', en bönni' yúlahui', para ilunë' ca rnna xtídz'a'gaquië'. Ral-la' ila'cu'ē sina' ilunë' le naca dxi'a. ² Biti' bi le ruá' dö' ral-la' ila'nnē' que luzá'agaquië', en bití' ila'díl-lalenē' légaquië' didza', pero ral-la' ilácagaquië' nöxaj ladxí', en idú ladxí' lógaca yúgu'të bönachi.

³ Lēsa' rē'u, zí'alö gúcaru' yugu' bönni' bití' ta'yéajni'inē', en gudá'baga'ru' Dios. Gudarú' nanítiru', en gúcaru' ca nupa nadó'ogaca, tu' benru' le guzé ládxi'ru' le ruá' dö', en ia'bal-la le guyaza ládxi'ru'. Benru' ca' le ruá' dö', en buzxé'eru' luzá'aru'. Biti' bila'lé'e bönachi rē'u dxi'a, ate' rē'u bití' bilé'eru' dxi'a luzá'aru' turu' ia'turu'. ⁴ Ní'irö bulu'e lahui Dios, Nu rusölá rē'u. Naca bē' náquië' idú dxi'a, en nadxí'inē' yúgu'të bönachi, ⁵ tu' busölé' rē'u, calēga tu' zoa bi le naca dxi'a benru' rē'u, pero tu' buéchi' ládxē'ē rē'u. Bunē' rē'u dxi'a, en benē' ga nácaru' bönachi cubi. Dios Bö' Lá'ayi rucubē' rē'u. ⁶ Dios gusól-lē'ē Dios Bö' Lá'ayi queéru' tu' néquiru' queë' Jesucristo, Nu rusölá rē'u. ⁷ Buzá' ládxē'ē queéru', en bunē' rē'u tsahui' para gata' yöl-la' na'bán idú queéru', le runru' löza gunnē' queéru'.

⁸ Didza' idútē li lē ni nuzúaja' lu guichi. Ré'ēnda' usédide'enu' yugu' bönni' ni' yugu' lē ni para iluí'i ládxi'gaquië' ilúntica'sē' le naca dxi'a tu' ta'yéajlë'ē Dios. Lē ni naca dxi'a, en nácada' lesaca' ila'zí' lu ná'agaca yúgu'të bönachi. ⁹ Na'a, bití' gu'u lataj nu güí'i didza' le cabí nazaca', o nu güí'i ladxí' ca nácagaca lágaca zióntērö cō' xuz xtó'ogaca bönachi, o nu tsöjgutsa' yugu' didza' bizxaj, en yugu' le ridil-la didza' ca naca que

xibá queë' Moisés, tu' cabí bi nazáca'gaca le caní, ate' cuntú nu uzí' xibé didza' caní.

¹⁰ Channö zoa nu bönni' ni', rubéajë' choplö bönachi queë' Cristo, tödi usó'o ládxë'ë tu ia'tú luzuí, bubéajë' bönni' na'. ¹¹ Nöz quézinu' chiböáquië' caní nu bönni' biti' náquië' tsahui', en runë' dul-la'. Chinabáguë'ë xíguia' ni'a que lë na' runë'.

Le buzúajë' Pablo lu guichi le gunbi' bi'i Tito

¹² Cate' isól-la'a-në' Artemas o Tíquico ga zu', bë' ladxi' guídu' ga ni zoa' lu yödzö Nicópolis, tu' chinuna' quia' ugá'ana' ni yugu' beo' ziaga. ¹³ Zenas, bönni' na' rudödë' didza' ca rinná bë' bönachi yúlalui', enca' Apolos, ila'dxinë' ga ni' zóali'. Bugú'u légaquië' nöza lu yöl-la' rácalen, para cabí bi yadzaj quégaquië'. ¹⁴ Busedi yugu' böchi' luzá'aru' ilúntica'së' le naca dxi'a, en bi ulu'nödzjë' quégaca nupa bi riyadzaj quéguequi, para gaca bë' caní le nácagaquië' queë' Cristo.

Pablo rugapë' Dios bönachi queë' Cristo

¹⁵ Yúgu'të nupa nacuá'len neda' tu'gapa Dios li'. Bugapa Dios nupa ni' nadxí'igaca rë'u tu' ta'yéajlë' Dios. Le ruzá' ládxë'ë Dios queëru' gácalen yúgu'tëli'. ¡Ca' gaca!